dito a piacer soto un pavion. Andò a basarli la man, prima fatoli el presente e presentatoli la letera di credenza, si alegrò de le gran vitorie aute, licet tal officio la Signoria nostra l'habi fato per soi oratori e altri, e alegrarsi di la sua sanità. El Signor, contra el consueto, li disse alcune parole sicome li disse altri turziman, videlicet che la Signoria fesse justitia, volendo conservar la paxe ha con lui. Scrive poi di le audientie aute da li bassà et presenti dati, et cussi ad altri, ut in litteris; e in el presente erano pani molto tristi, parevano samiti, che si vergognava a darli. Scrive li gran rechiami fati a la Porta, sì per la fusta prese la sua galia, quelle vedoe sono de lì, e parenti di feridi vivi, item, dil Spandolin e altri, e bisogneria con danari conzar la cossa, ut in litteris. Scrive, per relation di sier Hironimo Loredan qu. sier Lorenzo, come in Bursa erano zonte some zercha 300 di specie venute di Soria. Item scrive, el Signor havia mandato comandamento a Constantinopoli l'armata fusse preparada, zoè galie 60, per andar contra Rodi, qual in 4 zorni doveano esser preparade, poi è stà suspese; et ha inteso da uno, che per causa di Rodi el Signor turco torà impresa contra christiani. Serive dil Sophi, come

Di Roma, di 14. Coloquii col Papa, qual era tornato a la Magnana, zercha quella liga, qual à bon animo di farla con el Christianissimo re e la Signoria nostra, tutavia vol alcune cosse di Franza, e con questo va temporizando con li oratori yspani. Scrive, di l'armata di Franza quelli fanti vendeno le arme per Roma, e il Papa ha dà ducati 50 per uno a quelli capitani; la qual armata par tornerà in Provenza a disarmarsi.

Scrive poi zercha Agustin Gisi, qual havia fato le censure contra li piezi etc., che per consejo di uno avochato fo notà l'apelation; e coloquii auti col Papa di tal materia, qual voria si facesse uno instru-20 mento di aver auto li danari esso Gixi, e dato le zoje al reverendissimo cardenal Corner comesso nostro, poi si vedesse de jure quello vol la raxon di l'instrumento etc. Item, manda letere dil Secretario di Napoli, di 2.

Di Spagna, dil Corner orator nostro, di Barzelona, più letere di 21, 24, 29 et primo. Prima, come sta meglio esso Orator di la egritudine l'havea, ma dubita sarà longa. Il Re è partito et andato mia 8 lontano. Si tien non tornerà più, et questo perchè quelli di Barzelona, per compir le corte, voleano dal Re certe cosse, maxime il capitolo di le inquisition, e il Re non voria; et cussi si stava su

queste pratiche. Soa Maestà poi partiria per Cathelogna et anderia a per compir le altre corte. Scrive, l'orator di Franza haver rechiesto a quel Re li 100 milia scudi è ubligato dar quella Maestà per li capitoli tra loro per il regno di Napoli. Dice che li hanno dito li darà a Lion questo Ogni Santi scudi 60 milia, e per Nadal el resto. Al che l'orator francese instava averli tutti; e monsignor di Chievers li disse: « È questo quello aspetemo dal Christianissimo re? è contrario a quello nè ha facto dir, oferendosi far etc., et non vol di sto poco tempo acomodar el Re». Item, come a Barzelona ha principià il morbo, et per questo il Re parti. Item, il Gran canzelier averli ditto, il Re haver expedito la commission a Yspurch per quelli dieno venir a Verona al primo di Novembrio. Item scrive, come si pratica di lassar al governo di Barzelona e di quel regno l'arziepiscopo di Saragosa fo fiol natural dil re don Ferando, el qual vol ducati 10 milia a l'anno e il governo di tre regni, come havia in tempo di l'altro Re. Item, al governo di la Chastiglia si dice manderà et farà venir sua ameda madama Margarita, che al presente governa la Fiandra. Item, scrive instando licentia di repatriar etc.

Di Franza, da Bles, dil Justinian orator nostro, di 9. Come il Re era a solazo di caze, et aspetava risposta di Roma di capitoli mandati, et sotoscrita per Soa Majestà, e tien il Papa li aceterà. Item, manda letere di Spagna et d'Ingaltera di Oratori nostri.

Di Anglia, dil Surian orator nostro, date a Londra a di 15 Setembrio. Prima, come ha inteso certo la Cesarea Majestà nel suo ritorno la farà in Fiandra, la sarà a parlamento con quel Re zercha venir a tuor la corona, et volendo passar per il Stato di Milan, questo re d'Ingaltera vorà Soa Maestà dagi segurtà di non farli danno etc. Scrive, di novo par, in Dacia quel Re, qual ave per moglie una fiola fo dil re di Spagna, essendo sussitadi alcuni subditi contra di lui, à mandato a domandar ajuto di danari al nepote re di Romani electo, qual, non potendo servirlo, par el Christianissimo re l'habi servito; la qual cossa in Anglia à'uto a mal, parendo che Franza voy aver etiam con lui il re di Dazia cussì come à la Scozia. Scrive altre particularità, ut in litteris.

Di Milan, dil secretario Caroldo. Alcune nove di sguizari, et dil cardenal Sedunense; et come lo episcopo di Pistoja orator dil Papa a sguizari partiva per . . . dove veriano alcuni capi, et questo per non voler andar di longo per il gran morbo vi è. Item, Lutrech à'uto licentia di andar in Franza, e